

PROPOSTAS DA AGA E DOS CONCELLOS AFECTADOS PARA A LOITA CONTRA A AVESPA ASIÁTICA

Debido á preocupante situación que está a producir o asentamento e a proliferación da avespa asiática (*Vespa Velutina*) en Galicia, afectando tanto á apicultura, como a outras actividades económicas, como a fruticultura ou a explotación forestal, e mesmo provocando incidentes de seguridade cidadá, a Asociación Galega da Apicultura (AGA) e o Concello de San Sadurniño convocaron aos concellos afectados das provincias de Lugo e A Coruña a unha xuntanza que tivo lugar o pasado día 28 de agosto de 2015, na Casa da Cultura de San Sadurniño.

A esta xuntanza asistiron persoas representantes de 18 concellos (Ouro, Muras, As Pontes, San Sadurniño, Moeche, Ferrol, Cedeira, Cerdido, Oroso, Valdoviño, Narón, Fene, A Capela, Pontedeume, Abegondo, Cambre, Carral e Ames) e varios membros da AGA e das súas delegacións comarcais, así como doutras asociacións locais e persoas interesadas.

Logo dun frutífero debate as persoas asistentes **ACORDARON:**

1. Reiterar á Xunta de Galicia a solicitude dunha urxente xuntanza entre representantes da Consellería de Medio Rural, da AGA e dos concellos afectados, para debater sobre as medidas presentes e futuras para o control da avespa asiática.
2. Realizar nesa xuntanza as seguintes propostas de cara a combater a praga e mellorar a xestión do seu control:
 - Rectificar o protocolo de actuación elaborado pola Xunta de Galicia, de forma que se volva ao seu contido orixinal, e se indique que a eliminación e retirada dos niños ten que ser nos momentos de menos actividade da avespa (amencer e anoitecer).
 - Asemade, o protocolo debe ter como obxectivo final a erradicación da praga, así como asegurar que as medidas que se tomen sexan ambientalmente sustentables, e que se saliente de forma explícita a necesaria colaboración entre Administracións.
 - No caso que a empresa pública Tragsa siga a ser a encargada da retirada dos niños, esta terá que dispor dun horario de traballo axeitado ás necesidades reais, con persoal que realice estes labores ao amencer ou ao anoitecer.
 - Reducir a burocracia no proceso de comunicación de niños, de forma que o servizo responsable (012) dea respostas claras ás persoas comunicadoras.
 - Cumprir o prazo máximo, tal e como indica o protocolo, para a retirada dos niños comunicados ao 012.
 - Solicitar á Xunta informes periódicos sobre os efectos da praga (nº de niños detectados, nº niños retirados, concellos afectados, nº de picadas atendidas no SERGAS, sectores afectados: apicultura, fruticultura, explotación forestal...).
 - Incrementar as axudas á apicultura, con máis dotación xeral, e coa inclusión de subvencións para o traslado das colmeas a outras áreas libres da praga, ou mesmo compensacións por perda de colmeas.
 - Procurar outras fontes de financiamento para facer fronte ao incremento de custos por mor desta praga. Proponse que a Xunta dedique fondos comunitarios,

nomeadamente do novo período do FEADER, para a loita e o control da avésa asiática.

- Desenvolver campañas divulgativas xerais, de cara a informar á cidadanía, así como para a detección temperá de niños na primavera. Proponse mesmo facer anuncios en prensa e na TV.
- Centrar a loita por medio de actuacións preventivas, co reparto aos abelleiros de trampas, tanto con atraentes para a captura de fundadoras, como con feromonas para a captura de machos. Nomeadamente proponse que a Consellería achegue para a vindeira primavera e para o outono 4.000 novas trampas e 64.000 doses de atraentes, tanto nas áreas afectadas como nas súas proximidades. En todo caso as trampas non se deberían empregar durante o verán e o inverno para non capturar outro tipo de polinizadores.
- Promover, durante o verán, a protección dos apiarios e das hortas de froiteiras con cebos de substancias, coma os antiqueratinizantes de baixa toxicidade, que faciliten a inviabilidade dos niños
- Dotar os concellos de financiamento, medios e formación (individualmente ou de forma comarcal) para retirar aqueles niños que, principalmente no verán, xeren problemas de seguridade cidadá. En todo caso os equipos de actuación terán que ter medios e formación, e contar co apoio técnico dos abelleiros, e se propón empregar o gas sulfuroso ou vapor de auga no canto de insecticidas.
- Establecer un programa da seguimento e avaliación das medidas preventivas indicadas, de cara a valorar a súa eficacia.
- Promover a investigación do control da praga, sobre todo no eido das trampas e do control preventivo (p.ex. cebos selectivos). Esa investigación debe facerse en colaboración entre a Xunta e as Universidades, e procurar ter acceso a fontes de financiamento comunitarias.